

通志卷一百十五下

宋右迪功郎鄭樵漁仲撰

列傳第二十八下

劉馥字元穎沛國相人也避亂揚州建安初說袁術將
威寄秦翊使率眾與俱詣太祖太祖悅之辟爲司徒掾
後孫策所置廬江太守李述攻殺揚州刺史嚴象廬江
梅乾雷緒陳蘭等聚眾數萬在江淮間郡縣殘破太祖
方有袁紹之難謂馥可任以東南之事遂表爲揚州刺
史馥旣受命單馬造合肥空城建立州治南懷乾緒等

皆安集之貢獻相繼數年中恩化大行百姓樂其政流
民越江山而歸者以萬數於是聚諸生立學校廣屯田
興治芍陂及茹陂七門吳塘諸竭以溉稻田官民有畜
又高爲城壘多積木石編作草苫數千萬枚益貯魚膏
數千斛爲戰守備建安十三年卒孫權率十萬眾攻圍
合肥城百餘日時天連雨城欲崩於是以苫蓑覆之夜
然脂照城外視賊所作而爲備賊以破走揚州士民益
追思之以爲雖董安于之守晉陽不能過也及陂塘之
利至今爲用馥子靖黃初中從黃門侍郎遷廬江太守

詔曰卿父昔爲彼州今卿復典此郡可謂克負荷者也
轉任河內遷尙書賜爵關內侯出爲河南尹散騎常侍
應璩書與靖曰入作納言出臨京任富民之術日引月
長藩落高峻絕穿窬之心五種別出遠水火之災農器
必具無失時之闕蠶麥有苦備之用無雨濕之虞封符
指期無流連之吏鰥寡孤獨蒙廩振之實加之以明摘
幽微重之以秉憲不撓有司供承王命百里垂拱仰辦
雖昔趙張三王之治未足以方也靖爲政類如此初雖
如碎密終於百姓便之有馥遺風母喪去官後爲大司

農衛尉進封廣陸亭侯邑三百戶上疏陳儒訓之本曰
夫學者治亂之軌儀聖人之大教也自黃初以來崇立
太學二十餘年而寡有成者蓋由博士選輕諸生避役
高門子弟恥非其倫故夫學者雖有其名而無其人雖
設其教而無其功宜高選博士取行爲人表經任人師
者掌教國子依遵古法使二千石以上子孫年從十五
皆入太學明制黜陟榮辱之路其經明行修者則進之
以崇德荒教廢業者則退之以懲惡舉善而教不能則
勸浮華交游不禁自息矣闡弘大化以綏未賓六合承

風遠人來格此聖人之教致治之本也後遷鎮北將軍
假節都督河北諸軍事靖以爲經常之大法莫善於守
防使民夷有別遂開拓邊守屯據險要又修廣戾渠陵
大竭水溉灌薊南北三更種稻邊民利之嘉平六年薨
追贈征北將軍進封建成鄉侯諡曰景侯子熙嗣

司馬朗字伯達河內溫人也祖父雋潁川太守父防京

兆尹防有子八人朗最長次懿

懿卽晉宣王也

朗九歲人有道

其父字者朗曰慢人親者必不敬其親者也客謝之十
二試經爲童子郎時監試者以其身體壯大疑朗匿年

劾問朗朗曰朗之內外累世長大朗雖穉弱無仰高之風損年以求早成非志所爲也監試者異之後關東兵起故冀州刺史李邵家居野王近山險欲徙居溫朗謂邵曰脣齒之喻豈惟虞虢溫與野王卽是也今去彼而居此是爲避朝凶之期耳且君國人之望也今寇未至而先徙帶山之縣必駭是搖動民之心而開姦宄之原也竊爲郡內憂之邵不從邊山之民果亂內徙或爲寇鈔是時董卓遷天子都長安因留洛陽朗父防爲治書御史當徙西以四方雲擾乃遣朗將家屬還本縣或有

告朗欲逃亡者執以詣卓卓謂朗曰卿與吾亡兒同歲
幾大相負朗因曰明公以高世之德遭陽九之會清除
羣穢廣舉賢士此誠虛心垂慮將興至治也威德以隆
功業以著而兵難日起州郡鼎沸郊境之內民不安業
捐棄居產流亡竄匿雖四關設禁重加刑戮猶不絕息
此朗之所以於邑也願明公監觀往事少加三思卽榮
名並於日月伊周不足侔也卓曰吾亦悟之卿言有意
朗知卓必亡恐見留卽散財物以賂遺卓用事者求歸
鄉里到謂父老曰董卓悖逆爲天下所讐此忠臣義士

奮發之時也郡與京都境壤相接洛東有成皋北界大河天下興義兵者若未得進其勢必停於此此乃四分五裂戰爭之地難以自安不如及道路尙通舉宗東到黎陽黎陽有營兵趙威孫鄉里舊姻爲監營謁者統兵馬足以爲主若後有變徐復觀望未晚也父老戀舊莫有從者惟同縣趙咨將家屬俱與朗往焉後數月關東諸郡起兵眾數十萬皆集滎陽及河內諸將不能相一縱兵鈔略民人死者且半久之關東兵散太祖與呂布相持於濮陽朗乃將家還溫時歲大饑人相食朗收恤

宗族教訓諸弟不爲衰世解業年二十二太祖辟爲司空掾屬除成皋令以病去官復爲堂陽長其治務寬惠不行鞭杖而民不犯禁先時民有徙充都內者後縣調當作船徙民恐其不辦乃相率私還助之其見愛如此遷元城令入爲丞相主簿朗以爲天下土崩之勢由秦滅五等之制而郡國無蒐狩習戰之備故也今雖五等未可復行可令州郡並置兵外備四夷內威不軌於策爲長又以爲宜復井田往者以民各有累世之業難中奪之是以至今今承大亂之後民人分散土業無主皆

爲公田宜及此時復之議雖未施行然州郡領兵朗本意也遷兗州刺史政化大行百姓稱之雖在軍旅常麤衣惡食儉以率下雅好人倫典籍鄉人李覲等盛得名譽朗常顯貶下之後覲等敗時人服焉鍾繇王粲著論云非聖人不能致太平朗以爲伊顏之徒雖非聖人使得數世相承太平可致建安二十二年與夏侯惇臧霸等征吳到居巢軍士大疫朗躬巡視致醫藥遇疾卒時年四十七遺命布衣幅巾斂以時服州人追思之明帝卽位封朗子遺昌武亭侯邑百戶朗弟孚又以子望繼

朗後遺薨望子洪嗣初朗所與俱徙趙咨官至太常爲世好士

梁習字子虞陳郡柘人也爲郡綱紀太祖爲司空辟召爲漳長累轉乘氏海西下邳令所在有治績還爲西曹令史遷爲屬并土新附習以別部司馬領并州刺史時承高幹荒亂之餘胡狄在界張雄跋扈吏民亾叛入其部落兵家擁眾作爲寇害更相扇動往往碁時習到官誘諭招納皆禮召其豪右稍稍薦舉使詣幕府豪右已盡乃次發諸丁彊以爲義從又因大軍出征分請以爲

勇力吏兵已去之後稍移其家前後送鄴凡數萬口其
不從命者與兵致討斬首千數降附者萬計單于恭順
名王稽顙部曲服事供職同於編戶邊境肅清百姓布
野勤勸農桑令行禁止貢達名士咸顯於世語在常林
傳太祖嘉之賜爵關內侯更拜爲眞長老稱詠以爲自
所聞識刺史未有及習者建安十八年州并屬冀州更
拜議郎西部都督從事統屬冀州總故部曲又使於上
黨取大材供鄴宮室習表置屯田都尉二人領客六百
夫於道次耕種菽粟以給人牛之費後單于入侍西北

無虞習之績也文帝踐阼復置并州復爲刺史進封申
門亭侯邑百戶政治常爲天下最太和二年徵拜大司
農習在州二十餘年而居處貧窮無方面珍物明帝異
之禮賜甚厚四年薨子施嗣初濟陰王思與習俱爲西
曹令史思因直日白事失太祖指太祖大怒教召主者
將加重辟時思近出習代往對已被收執矣思乃馳還
自陳已罪罪應受死太祖歎習之不言思之識分曰何
意吾軍中有二義士乎後同時擢爲刺史思領豫州思
亦能吏然苛碎無大體官至九卿封列侯

張旣字德容馮翊高陵人也世單家富爲人有容儀少
小工書疏爲郡門下小吏自惟門寒念無以自達乃常
畜好刀筆及版奏伺諸大吏有乏者輒給與以是見識
焉後忝右職舉孝廉不行太祖爲司空辟未至舉茂才
除新豐令治爲三輔第一時袁尙拒太祖於黎陽遣所
署河東太守郭援并州刺史高幹及匈奴單于取平陽
發使西與關中諸將合從司隸校尉鍾繇遣旣說將軍
馬騰等旣爲言利害騰等從之騰遣子超將兵萬餘人
與鍾繇會擊幹援大破之斬援首幹及單于皆降其後

幹復舉并州反河內張晟眾萬餘人無所屬寇嶠澗間
河東衛固弘農張瑒各起兵以應之太祖以旣爲議郎
參繇軍事使西徵諸將馬騰等皆引兵會擊晟等破之
斬瑒固首幹奔荊州封旣武始亭侯太祖將征荊州而
騰等分據關中太祖復遣旣喻騰等令釋部曲東還騰
已許之而更猶豫旣恐爲變乃移諸縣促儲侍二千石
郊迎騰不得已發東太祖表騰爲衛尉子超爲將軍統
其眾後超反旣從太祖破超於華陰西定關右以旣爲
京兆尹招懷流民興復縣邑百姓懷之魏國旣建爲尙

書出爲雍州刺史太祖謂旣曰還君本州可謂衣繡畫
行矣從征張魯別從散關入討叛氏收其麥以給軍食
魯降旣說太祖拔漢中民以實長安及三輔其後與曹
洪破吳蘭於下辯又與夏侯淵宋建別攻臨洮狄道平
之是時太祖徙民以充河北隴西天水南安民相恐動
擾擾不安旣假三郡人爲將吏者休課使治屋宅作水
碓民心遂安太祖將拔漢中守恐劉備北取武都氏以
逼關中以問旣旣曰可勸使北出就穀以避賊前至者
厚其寵賞則先者知利後必慕之太祖從其策乃自到

漢中引出諸軍令旣之武都徙氏五萬餘落出居扶風
天水界是時武威顏俊張掖和鸞酒泉黃華西平麴演
等並舉郡反自號將軍更相攻擊俊遣使送母及子詣
太祖爲質求助太祖問旣旣曰俊等外假國威內生悖
逆計定勢足後卽反耳今方事定蜀且宜兩存而鬪之
猶卞莊子之刺虎坐收其斃也太祖曰善歲餘鸞遂殺
俊武威王祕又殺鸞是時不置涼州自三輔拒西域皆
屬雍州文帝卽王位初置涼州以安定太守鄒岐爲刺
史張掖張進執郡守舉兵拒岐黃華麴演各逐故太守